

14. februar 2018

Inatsisartut suleriaasianni § 37 imm. 1 naapertorlugu Naalakkersuisunut apeqqut imaattoq matumuuna saqqummiuppara:

Naalakkersuisunut apeqqut:

- 1. Naalakkersuisut ullukkut unnuakkullu paaqqinnittarfiit Naamminersor-nerusuniit pigineqartuni pillugit suliassaq, tassalu sulisut atugarissaarnerat pillugit misissuinissat aallartinniarlugit atulersissallugit isumaliutiginninnerat sumummita killippat?**
- 2. Misissuinissat taamaattut APV-mik tunngaveqarluni inatsisikkullu aallaave-qarluni misissuinissanut tunngatinneqassappata (tassunngaluunniit atasumik), minnerpaamik ukiut pingasukkaarlugit ingerlanneqassappata, aningaasartuutigissamaakkaanut ilassutissat missiliunnarlugit qanormita annertutigissangatinneqarpat?**
- 3. Naalakkersuisut Namminersornerusut suliffeqarfiutaani ullukkut unnuakkullu paaqqinnittarfinni najugaqartut ilaquaasullu atugarissaarnerannik misissuinissamik isumaliutiginninnerat sumummita killippat?**
- 4. Atugarissaarnissamik misissuinissanut aningaasartuutigissamaakkat qanormita missiliorlugit annertussuseqassanngatippat, s.a. misissuinissat ukiut marluk allortarlugit ingerlanneqassasuuppata?**

(Inatsisartuni ilaasortaq, Laura Táunâjik, Siumut)

Tunngavilersuutit:

Namminersornerusut suliffeqarfiutaani ullukkut unnuakkullu paaqqinnittarfiit sulisunut najugaqartunullu qanoq ililluta killissarititaasut pitsaasumik toqqisisimasumillu qulakeersinnaavarput? Apeqqut taanna annertuumik eqqarsaatinniittuarsimavoq.

Ullukkut unnuakkullu najugaqartut amerlanertigut sanngiitsuaraaput taamaammatt atugarissaarnikkut killissarititaasut pitsaasumik toqqisisimasumillu aaqqissuussimanissaat pisariaqartippaat. Paaqqin-niffinni pineqartuni tamakkununnga akisussaatinneqartut pingarnerpaamik tassaapput paaqqinnifiit pisortaat. Pisortaasut suliffeqarfinni tamakkunani ataasiakkaani soorunami aamma sulisut atugaris-saarnissaannut tunngasutigut pingarnerpaamik akisussaapput, kiisalu sulisut akunnerminni akaare-qatigiinnerannut tunngasut aamma isumagissallugit.

Inunniq Isumaginninnikkut, llaqutariinnut, Naligiissitaanermut Inatsiseqarnikkullu naalakkersuiso-qarfiup allaffeqarfia ullukkut unnuakkullu paaqqinniffit nakkutigisassarivaat, equngasoqarpallu ingerlaannartumik akulerussinnaallutik departementip ajornartorsiutaasunut paasisaqarlutik ilisi-masaqaleriarpata. Apeqquq uanniippoq, qanoq ililluta qulakkeersinnaanerippup ajornartorsiutaasut ilumut departementimut annguttassanersut, ajornartorsiutillu allivallaalersinnagit iliuuseqapallattoq-arnissaa qulakkeerniassagutsigu, siusittumik iliuuseqarnikkut ajornartorsiutit asuli allisaannaruma-nagit iliuuseqapallattoqarnissaa isumagissallugu.

Sulisunut ataasiakkaanut unamminarunaqaaq sassarniassaguni pissutsit atuuttut pillugit isornartor-siuissappat, minnerunngitsumillu suliffeqarfip aqqisuulluakkamik ingerlasimanngippat aammalu ajornartorsiut pisortamiippat suli ajornakusoornerussalluni. Taamatuttaaq najugaqartunut ilaqua-sunullu aamma unamminarunaqaaq ajornartorsiutinik tikkuartuissallutik, sulisut toqqaannartumik isumalluutigeqisatik isornartorsiussallugit imaannaangitsorujussammat.

Tamatumani eqqarsaatigaara ilumut atugassarissaarnikkut misissuinissaq sulisunut najugaqartunullu immaqa sakkugissallugit tulluarlunilu naleqarluarsinnaasoq – tassami minnerunngitsumik aamma atugarissaarnikkut misissuinerit aammalu atuisut atugarissaarnerannut tunngasutigut misissuinerit kinaassuseq isertuullugu ingerlanneqarsinnaammata.

Ukioq 2015 naajartulermat Naalakkersuisut apeqquteqaateqarfigaakka (§ 37 nr. 289/2015), Naalak-kersuisut arlaatigut namminersornerusut suliffeqarfiutaanni ullukkut unnuakkullu paaqqinniffinni sulisut atugarissaarnerata killiffiannik misissuititsisimanersut, imaluunniit atuisut ilaquaasullu naammaginnissimaarnerannut tunngasutigut misissuisoqarsimanersoq. Sunaaffami misissuisoqarsi-manngitsoq.

Ilanngullugu aamma Naalakkersuisut aperaakka, siunissami misissuinissanik taamaattunik pilersaar-tuteqarsimanersut.

Naalakkersuisut akissuteqarnerminni ersersippaat ullukkut unnuakkullu paaqqinniffinni suliffe-qarfittut aaqqissuussaanikkut inerisaasoqartoq, aammalu tassunga tunngatillugu suliniutaasoq najugaqartut ilaquaasullu oqartussaaqataanerunissaat qulakkeerumallugu inerisaasoqartoq. Naalakkersuisut akissuteqaateqarnerata nalaani suli aalajangersimanngilaq, oqartussaaqataane-runissamik aaqqissuussinissaq qaqugukkut atuutilissanersoq aammalu qanoq isikkoqassanersoq, taamaallaat ilalorsorpaat, atugarissaarnikkut misissuinissaq periarfissat ilaattut atorneqarsinnaammata.

Naalakkersuisuttaaq aamma ersersippaat, suliffiup aaqqissuusaanerata inerisarnera iluatsillugu eqqarsaatigineqarsinnaasoq, sulisut atugarissaarnikkut misissuiffigineqarnerat pitsaassutsimut uuttortaalluarsinnaasutut eqqarsaatigineqarsinnaammata. Naalakkersuisut aamma tassunga tunngatillugu oqaatigivaat, Aningaasaqarnermut- Sulisoqarnermullu Aqutsisoqarfik, ikiuutaa-sinnaammata ullukkut unnuakkullu paaqqinniffinni atugarissaarnikkut misissuisoqarniarpat, taamaallaat piumasaqaatigalugu ikiuisoqassappat atuisut akiliunneqaqqullugit departementimiit imaluunniit paaqqinniffinniit.

Kissaatigaara apeqquteqaatiga ullut suliffiusut 10 ingerlanerani akineqassasoq.